

Quand nos-èstin.n' gamins – nos soûs, c'èsteûve parèy –
On nos-a promètu dès djoudjoûwes à moncias ;
Po lès parints d'adon, ci n'èsteûve qu'one ostèye :
Fé roter l' drwèt do djeu, c'est ç' qu'i-gn-aveut d' pus bia.
Saquants-anéyes pus taurd, waîtî d'awè s' diplôme,
Ça passeut d'avant l' rèstant, on n' tûzeut qu'à bouter :
« Qu'èst ç' qu'i-gn-a d' pus minâbe qui d' veûy on'ome qui chôme :
Portant on l'a prév'nu ! I n'a nin v'lu choûter ! »
Rèlire one djon.ne comére po tote si vikériye,
Ça valeut bin lès pwin.nes di waîtî à deûs côps ;
Si promète d'èsse fidèle, ça n'èspêche nin qu'à fîye
On mèt s' pîd su l' costé, mins ça n'compte nin biacôp.
Byin pus fwârt qui tot ça, nos v'nans d'enn'awè l' preûve
À nosse dêrin vôtadje, c'est co zèls qu'ont l' pompon :
One dozin.ne di rêlîs, lomés, qu'èstin.n' à l'eûve
D'on costé, oblidyîs d' quiter ç' place là po d' bon.
N'alez surtout nin crwêre qu'i n'èstin.n' nin capâbes ;
C'est pace qu'il ont gangnî ç' côp ci aus-élècsions ;
I vont div'nu mayeûrs ! Por zèls, c'è-st-on côp d' sâbe :
Po lès rècoradjî, on l'zeû done quate millions.
Quate millions d'ancyins francs, one èspèce di dringuèle
Pace qu'il ont yeû l' maleûr di d'vu abandoner
One place qu'i mèritin.n', qu'aveut mètu on fèl
Pwèds su leûs dos po fé tot ç' qu'on l'zî a d'mandé.
Il avin.n' promètu, quand i sèrin.n' mayeûrs,
Di n' s'ocuper qu' dès djins, dès p'tits, dès malèrèûs ;
Leû prime, on n' sét jamais, si on djoû, pâr bouneûr
I têrin.n' leûs promèsses, i l' paurtadjerin.n'è deûs :
On mitan po lès pôves èt l'ôte po lès minâbes,
On pôreûve riniyî li spot do timps passé
Què lès mostreûve au dwègt, lès prumîs rèspon'sâbes :
« Si rwiner à promète, s'aritchi à n' rin d'ner ! »